

# **Poldi Filipai**

## **Habu Yengele Hibi Kwelengkewec**

*Mimi-yegengyowa*

Filipai yogo taon sugucne monic Masedonia prowins iwa fagac. Pol ye Yesule siduc mac nga taon fagacsoc minogale mac lolickelu gawec. Ye alecine yaeckang Filipai iwa hikewec (Salecebaicne 16:12-40). Hikelu Yesule siduc milu edocebame iwa Yesule habu fikeibong. Hegile hikelu yogolec lobeina alecine habackang Filipai iwa hatacmac hikelu ngiye-fac aiwec. Ailu Yerusalem hikewec (Salecebaicne 20:6). Yerusalem hikelu game Roma ngic yengi muc-macka loibong. Dameng iwa Roma gamang ye Roma taon nga Israel himong fagaingsoc damongkewec. Ye Roma iwa bahikebong muc-macka iwa ngiyewec (Salecebaicne 21, 28). Muc-macka ngiyelu Timotiholec hibi yago kwelengkelu Epafodaitus lacnoboc bahikelu Yesule habu Filipai gaibong yenge yelewec.

Soc tofaine helockeicnele aibaba yogolec fungine yanguc, Wapong ye Abraham yanguc milu edowec, “soc tofangineng helockedaing.” Aibaba yogo socte maa yegengkeme Wapongte aling gacaigaing. Ilec ailu Israel aling yenge Abrahamte fikesaweckacni, yenge Wapongte yowa balaibenogale aibaba yogo balaibecaigaing. Yesule damengka Israel ngic-ngigac gocne yenge ngagebong soc tofangineng mi helockeicne yenge

Wapongte aling nalic mi gadaingte. Poldi ngage-  
ngage yogo Filipai 3:2-5 iwa kwelengkewec fagac.

*Yowa yago hibi nebocina fagac*

1:1–11 Kwele-madic yowa

1:12–30 Polle aibaba yogo yanguc, ye umackolec  
game Kristodi bafickeme beliyelu gawec

2:1–30 Nongileng Kristo ingucne aidabeleng

3:1–21 Sawang-yowa gocne miwec

4:1–23 Wapongte yowa weduyelewec

*Hibile molic-molic yowa*

<sup>1</sup> Na Kristo Yesule kwelec kwekwe ngic Pol, na nga Timoti, noki ngengele hibi yago logabelec. Ngic-ngigac Wapongte bingec Filipai taonka Kristo Yesuholec wetackelu gacaigaing, gocne yengele damongfocngineng, nga gocne yengele mole-baficfocngineng, sasawa ngengela hibi yago logabelec.

<sup>2</sup> Mamacnonggeng Wapong nga Sugucnenonggeng Yesu Kristo yekele kwele-madic, nga kwele-mogungtowadi ngengela fadaic.

*Kwele-madic yowa*

<sup>3</sup> Na ngengele ngagesicaigabac, dameng iwa Wapongne kwele-madic edocaigabac.

<sup>4-5</sup> Siduc Madicnele bole molickelu baofecgubeng yakumac aigac, ngenge naholec bolele aling moniyang ailu gaibeng. Ilec ailu ngengele ngagesilu belic-belicka milockecaigabac.

<sup>6</sup> Ailu yanguc ngagepangkecaigabac, Wapongti bole madicne kwelenginang biyachac molickelu

bawec, yogo taockelu balu gagac. Bagacgu Kristo Yesule damengtowa kwesime, iwa boleine yogo bamoctoyackedaicte.

<sup>7</sup> Na ngengele inguc ngagelu kwelenedi angacnume gabe dondongkegac. Na muc-macka gagabac, me Siduc Madicnele fungine mibe yegengkegac, me Siduc Madicne basanangkegabac, iwa ngenge sasawadi naholec Wapongte kwele-madicka aling moniyang gagabeleng.

<sup>8</sup> Wapongti yogo foinac widecnume yowa yanguc migabac, Kristo Yesule kwele-sowacti molick-eme ngengeholec ganogale angacnugac.

<sup>9-10</sup> Aime aibaba weni yogodi madicne aigac, ngenge yogo nalic wosaeningte yanguc milockecaigabac, ngenge kwele-angacka damongnagulu gadabiyeng. Aime angac yogodi sugulelu ngengele ngage-ngagewa bafickelu kweme haulu gbolongne aime, Wapongte yefe ngage-motodaingte, inguc milockecaigabac. Ngenge inguc ngagemotolu Kristole damengtowa kwesime, gbagbacne nga bikicngineng mikac domadaingte.

<sup>11</sup> Domaebongka gaga dondonnele noine Yesu Kristole wacka bame wakengeledaicte. Yogodi Wapongte wac feicne nga mimi-madic bafuwadaicte.

*Muc-macka ngiyeme Kristole siduc sugulewec*

<sup>12-13</sup> Aime lebe-ngic ngictaule oda kwelina gai-bong, ailu ngic-ngigac sasawa yawa gaibong, yenge sasawadi yanguc biyac ngani-motoibong, ngic yogo ye Kristole ailu muc-macka gagac.

Gabe nala pasi fikewecte Siduc Madicnele bole hatacmac basanangkeme sugulewec. Ngic haegbafocne, nenge yogo ngageningte angacnugac.\*

<sup>14</sup> Muc-macka ngiyegabacte ngic haegbafocnonggeng bocyac yenge ngagenagengineng Sugucnela lobong sanangkewec. Sanangkeme Wapongte yowa hangoc mikac milu gagaing.

<sup>15-17</sup> Na sanangne domalu Kristole Siduc Madicne edocebalu weduyelenogale Wapongti locnuwec, yenge yogo ngagelu yefe dondonna Kristole siduc kwele-angacka mibong yegengkelu fagac. Habu tofaine yengibac soc bafefe nga ngaba ngage-ngagewa galu Kristole siduc mibong yegengkelu fagac. Milu nale yanguc ngagesigaing, ye muc-macka game Kristole siduc mibeng umac haicine monic-monic bafuwadaicte.

<sup>18</sup> Ailu ngage-ngage kwesacine me ngage-ngage noine Kristole siduc mibong yegengkelu facaigac, yogo ngagebe madickegac. I yangucte, yenge Kristole siduc mibong yegengkegac, yogodi wiyac feicne aigac. Inguc ngagelu yanguctihac beliyegabac. Ailu hatacmac beliyedactehac.

<sup>19</sup> Inguc aibong nengele mimiloc nga Yesu Kristole Asudi bafuwacnugac. Ilec yanguc ngagesigabac, umacne baickeme wasecne aidacte.

<sup>20</sup> Aime angacne yanguc fame wangec gagabac, wiyac monicte me monicte ngagebe gameineholec mi aidaicte. Na gadacte me homadacte,

---

\* **1:12-13:** Ngictau ye le oda kwelina yeicne macine fawec. Ailu ofis haicine monic-monic nga muc-mac, ailu bole alingte mac fayackewec. **1:12-13:** Sale 28:30 **1:19:** 2Kor 1:11

socnedi wiyac aidacte yogo Kristo wac sugucne lacnolu gadacte. Ilec mi hangocnugac.

<sup>21</sup> Naneicne gagane yogo Kristo wac feicne lacnolu gagabac, yogo ngagebe madickegac. Aime homadacte iwa yeholec wetackelu gadacte, yogo ngagebe madicke-benangkegac.

<sup>22</sup> Aime sockolec galu bole babe noine bocyac fikedaicte. Ilec wenuc midacte, gagane me homacne, yogo mi ngage-motogabac.

<sup>23</sup> Angac yaeckang ingucnedi fulucnume gagabac. Homalu Kristoholec ganogale bocyac ainelegac, yogodibac wiyac sasawa ewaliyackedaicte.

<sup>24</sup> Aimebac ngengele madicnele ailu gagane hatacmac taockelu gadacte.

<sup>25</sup> Yogo yanguc ngagepangkegabac, na ngengeholec galu baficngababe, ngagenngagesingngineng sugulelu sanangkeme beliyelu gadaingte.

<sup>26</sup> Aime ngengeholec hatacmac ganogale fube Kristo Yesule ailu belic-belic sugucnehac aidaingte.

### *Weyebic aingeledaingte*

<sup>27-28</sup> Na fulu nganicngebadaicte, me dalicka galu ngengele yowa-siduc yanguc ngagedacte. Ngenge asungineng moniyang, nga kwelengineng moniyang galu, ngabafocngineng yengele mi hangocngebadaic. Ailu ngenge sanangne domalu yengi Siduc Madicne ngagesingkeningte, bole yogo doicineholec bacaigaing. Inguc fikenale ngenge Kristole Siduc Madicne yogolec silicka

gadabiyeng. Aibaba yogodi ngabafocngineng yanguc edalicebadaicte, yenge sowalelu miyac aidaingte. Aimebac ngengele bikicte ameine bame wasecne aidaingte. Wapongti inguc aidaicte.

<sup>29</sup> Ilec ngenge Kristole ailu wiyac yanguc ngelewec, ngenge Kristo ngagesingkeibong ingucnehac, yele ailu ngaba nga doicka locngubaibong, ingucnehac ngelewec.

<sup>30</sup> Molickelu doickolec gagale boletowa balu gaiba, yogo dongedi nganiibong. Ailu yakumac balu gagabac yogo ngagegaing, silicine ingucnehac ngenge yakumac balu gagaing.

## 2

### *Dongengineng Kristola hiladaing*

<sup>1</sup> Ngenge Kristoholec wetackeibong, yogodi basananggebame Kristole kwele-angacti bakolocngebalu gagac. Ailu Tili Asuholec kpatulecngebalu kwele-mogung aingelelu kwelesowac ngagengelegac.

<sup>2</sup> Ilec ailu hewacnginang nge-nge moniyang nga kwele-moniyangka kweledi angac ngagenagudaing. Inguc aibong na beliyelu ngegebe motodaicte.

<sup>3</sup> Ngenge wac sugucne banogale mi aidaing. Ailu soc bafefe mi gadabiyeng. Ngenge aibaba yogo hegilelu socngineng bawacnagulu, ngicngigac agofocngineng yengele wac bafelu ngengileng wac bawalu gadabiyeng.

4 Gageicne woc-wiyac sugu mi damongkedamec, agofogone yengele woc-wiyac momochac baficebalu damongkedamec.

5 Kristo Yesule pasi nga ngage-ngage fagac, ngenge silicine yanguc ngagedabiyeng.

6 Kristo ye Waponghac gawec.

Ailu ye Wapongkolec angasoc ganogale mi ngagewec.

7 Ye yeicne gaga hegilelu kwelec kwekwe ngic aiwec.

Ailu ye ngic soc balu ngic silic fikeme nganiibong.

8 Ye ngic fikelu yeuctihac socine bawalu Wapongte yowa balaibelu gacgu homawec.

Homacine yogo malicpongka homawec.

9 Ilec ailu Wapongti ye bafelu wac feicnehac lacnolu gunungkewec, wac yogo wac sasawa ewaliyackegac.

10 Ye inguc aime honocmengka gagaing, nga himongka gagaing, ailu wiyac sasawa gagaing, yenge Yesule wacka socngineng bawacnagulu ketadi holecnoyackening.

11 Ailu ngic-ngigac sasawadi Yesu Kristo ye Sugucne, inguc mibong yegengkedaic.

Inguc aibong wac feicne yogodi Wapong Mamacte ainowagac.

### *Himongka angoc ingucne ganoga*

12 Ilec agofocne kwelenedi ngengele angac ngagegabac, ngenge esecne damengsoc yowane balaibelu gaibong. Yogo ngengele emewa

---

2:4: 1Kor 10:24    2:6: Yoa 1:1-2; 17:5    2:7: 2Kor 8:9; Yoa 1:14  
 2:8: Hib 5:8; 12:2    2:9: Sale 2:33; Efs 1:20-21; Hib 1:3-4    2:10:  
 Rom 14:11    2:11: Rom 10:9

gabe yowane balaibeibong. Ingucnehac yakumac dalicka gabe nenge yowane balaibelu hangoc ailu dengdenggebame boletowa balu gadabiyeng. Gacgubong damengngine kwesime wasecne aidaingte.

<sup>13</sup> Wapong ye bole aling madicne fikenale kwe-lenginang bole balu gagac. Inguc balu game ngage-ngagenginengti ye balaibedaingte. Ailu bole yogo baningte tapili ngelelu gagac.

<sup>14</sup> Ilec bole sasawa badabiyengtewa, nenge tatakic yowa nga yowadi fec-wac mi ainagud-abiyeng.

<sup>15</sup> Inguc aidaingtewa, yanguc edalidaingte, Wapongte adu-madec gagaing, nenge sowacnengineng mikac galu gbagbacne nga dondonne domadabiyeng. Nenge, ngic-ngigac sowacnebenang nga yefe lilolu gagaing, yengele hewacnginang domalu Wapongte yowa gagaineholec bagalu angoc ingucne himongtowa yagowa kwebong angoledaicte.

<sup>16</sup> Nenge inguc aibong, Kristole damengtowa kwesime, nengele ngagebe wiyac feicne aidaicte. Aime yanguc midacte, na moc mi gasackeiba, me bolene baiba yogo noine mikac monic mi aiwec.

<sup>17</sup> Nenge ngage-ngagesingte bole yogo depecte hasoc ingucne balu gagaing. Aime ngabafocne yengi wehomacnulu yogolec feina nale sac sot-ingkedaingtewa, na sifu yogolec angac ngagelu



ngengeholec beliyegabac.\*

<sup>18</sup> Aime nenge yefe iwahac angac ngagelu naholec momoc beliyedabeleng.

### *Timoti nga Epafodaitus*

<sup>19</sup> Sugucne Yesudi ngageme nalic aime, dameng mi daliweme Timoti salebe fudaicte. Ailu ye hefaliyelu nenge wenuc gagaing, yogolec siduc edocnume kwelene madickedaicte.

<sup>20</sup> I yangucte, ngic monic Timoti ingucne naholec mi gagac, miyac. Ye moniyangti sugu kweleinedi sugucnehac ngengele aicaigac.

<sup>21</sup> Aime ngic-ngigac naholec gagaing, yenge yengileng wiyacte sugu ngagecaigaing. Ailu Yesu Kristole wiyacte monic mi ngagecaigaing.

<sup>22</sup> Aime Timoti ye aibabaine madicne, nenge yogo ngagegaing. Ye madecti mamacineholec bole balu gagac, silicine ingucnehac, naholec Siduc Madicnele bole baficnume balu gagabelec.

<sup>23</sup> Aime nala yefe wenuc fikedaicte, yogo ngagemotolubac ye biyac salebe funale ngagesigabac.

<sup>24</sup> Ailu Sugucne ngagepangkelu yanguc ngagegabac, naneuc dameng mi daliweme ngengela inguchac fudacte.

<sup>25</sup> Aime ngengi salecebaicnengineng Epafodaitus salebong kwesi domalu kwesingnume, wiyac monicte mi kpungkegabac. Ye naholec bole balu gagac. Ailu naholec galu Sugucnele hudu-baba

---

\* **2:17:** Wapongti angac ngagenale, Yuda yenge depecnengineng madicne feina waing misa sotiyepong haulu gawec. Polle sac silicine ingucnehac sotiyeidaicte, ilec beliyewec. Himong kisiwa 15:3-10 iwa wafedaing. **2:18:** Filp 3:1; 4:4 **2:21:** 2Tim 4:10

ngic, ye gbane ingucne ailu gagac. Aime ye salebe ngengele hatacmac funale ngagebe fudaicte.

<sup>26</sup> Ye huc aicnome siducine ngageibong. Ilec ailu ye ngengele ngageboc ailu kweleinedi ngengele aicnolu gagac.

<sup>27</sup> Aime foinac, ye huc aicnome homanogale aiwec. Entacka ye homadecka, na kwele-umac sugucne feina taockeneleme ngagedacka. Ailu ye sugu miyac, Wapongti na momoc kwele-sowac ngagenotelu baficnupawec.

<sup>28</sup> Aime ngengi ye nganilu beliyedaingte. Aime na kwele-sowac mikac ganogale ye salebe ngengele fudaicte, yogo sanangnehac ngagesigabac.

<sup>29</sup> Aime ngenge Sugucneholec wetackeningte ailu, ye kwelenginengti angac ngagecnolu mac holecnolu ye nga ngic ingucne gocne gagaing, yenge alang bayeledaing.

<sup>30</sup> Ailu ngengi baficnuningte kpungkeebongka, yedi kwesilu baficnume Yesu Kristole bolele ailu socine basowalelu homanogale aiwec.

### 3

#### *Kristoholec gaga*

<sup>1</sup> Ilec yanguc taockelu migabac, ngic haegbafocne, ngenge Sugucneholec wetackelu belic-belicka gadabiyeng. Na yowa molickelu kwelengkengeleiba, yogo hatacmac kwelengkengelenogale mi takicnugac, miyac. Ngenge yowa yogodi asa bacngebadaicte.

2 Ngic aibabangineng hoda ingucne wonongkolec gagaing,\* yenge aibaba sowacne aicaigaing, ngenge ngic yogo yengele ngani-motolu gadabiyeng. Ngic yogo yenge kwesacngebalu yanguc edocngebacaigaing, “Ngenge soc tofangineng helockedabiyeng.” Ilec ngani-motolu gadabiyeng.

3 Wapongte Asudi pasi nongilang bame afeelu kwelec kwegabeleng, nongilengti hocne soc tofangineng helockeicne ingucnehac kwelenonggang ngagesilu aicaigabeleng. Nongileng Kristo Yesule ngagebeng feicne aigac. Ailu socnonggenge maale monic mi ngagepangkegabeleng.

4 Aime ngage-ngagene yogo aibabana lobe fanale ngagedacka. Aime ngic gocne yenge aibabanginang ngage-ngagengineng lobong facaigac, ingucnehac lobe fadecka midec, na silicine ingucnehac ewalicebalu aidacte.

5 Aime fikebe hadeng 8 aiyemewa soc tofane helockeibong. Na Israel alingkacni nga Benyaminte fikesaweckacni. Na Hibru ngicbenang ailu Hibru alingkacni. Ailu Farisaio yengeholec Wapongte yefe-yowa balaibeiba.

6 Ailu na yefe-yowa monic mi hegilelu ngic dondonne gaiba. Ailu na Wapongte yefe-yowa basanangkenogale dogbac ailu Yesule habu weyebic aiyelelu gaiba.

---

\* **3:2:** Israel ngic-ngigac yenge aling gocne bawacebaningte hoda wacebalu gaibong. Siduc yawa Poldi Israel ngic-ngigac gocne hoda wacebawec. **3:3:** Rom 2:29 **3:4:** 2Kor 11:18 **3:5:** Luk 1:59; 2Kor 11:22; Sale 23:6 **3:6:** Sale 8:3

<sup>7</sup> Ailu molickelu wiyac bagalu ngagebe yogodi baficnudaicte ingucne aiwec, yogo hocne yakumac Kristole ailu ngagebe wiyac sasawa yogo babaficine mikac aigac.

<sup>8</sup> Na Sugucnene Kristo Yesule babafic yogo ngagebe feicnetowa aigac. Ilec ailu esecne galu wiyac sasawa aiiba, yogolec ngagebe babaficine mikac aicaigac. Gagana Kristo banogale ailu, wiyac sasawa ngagebe yafoine aiyackewec, yogo biyac hegileyackeiba.

<sup>9</sup> Wapongte yefe-yowa balaibelu neicne tapiliwa ngic dondonne nalic mi aidacte. Wapongti ngage-ngagesingte yefe yanguc lowec, monic ye Kristo ngagesingkedaicte, ye ngic dondonne aidaicte. Ingucnele ailu Kristoholec wetackebe Wapongti ngic dondonne wacnume madickegabac.

<sup>10</sup> Ailu Kristo yeicne nga Wapongte tapili yeuc-tihac Kristo bagboliyeme homackacni fangkewec, yogo homacnehac ngagenogale ainelegac. Ailu yeholec galu doic ngagelu ye homawec, ingucnehac galu homanogale ngagegabac.

<sup>11</sup> Inguc aigacgu homackacni gboliyelu fangkenogale ngagesigabac.

### *Gbelong ainogale gasackedamec*

<sup>12</sup> Na gagasac bole yogo biyachac bamoctoiba, me biyac ewalilu gbelong aiiba, na inguc mi mi-gabac, miyac. Kristo Yesudi bacnuwec. Ilec ailu yogo banogale gagasac bole balu gagabachac.

13 Ngic hae-gbafocne, na gbelong ailu wiyac biyachac baiba, inguc mi ngagesigabac. Ailu bole moniyang yanguc balu gagabac, wiyac biyachac aiiba, yogo hatacmac mi ngagesilu gagabac. Ailu wiyac lobewa fikedaicte, yogo banogale bole sanangne balu gagabac.

14 Ailu na biyachenang maawa† hikelu gbelong ailu wiyac banogale gasackegabac. Yogolec hocne Wapongti wacnuwecte Kristo Yesuholec wetackelu honocmengka gadacte.

15 Aime ngage-ngagesingka biyachac sugulelu sanangkeibeng, nongileng sasawadi inguc gasackenogale ngagesidabeleng. Aime ngage-ngagengineng fulucnagudaingtewa, Wapongti ngage-ngagengineng yogo inguchac bame yegengkengedaicte.

16 Ailu yowa biyachac ngagelu gaibeng, yogohac balaibelu hikedabeleng.

### *Ngage-ngage madicne*

17 Ngic hae-gbafocne, nani molickengelebe ngenge yogo nganilu silicine ingucnehac balaibecnudabiyeng. Ailu ngic nongele silic balaibecaigaing, ngenge dongengineng yenge nganicebalu balaibedaing.

18 Molickelu dameng bocyac yowa edocngebalu gaiba, yogo yakumac hiyalu donge-misane wame hatacmac edocngebagabac. Ngic bocyac yengi Kristole malicpongte ngaba ailu gagaing.

19 Wapongngineng kwesacine, yogodi nosingte gobe ingucne aicaigac. Aime aibabangineng

---

† **3:14:** Maa yogo Kristo ingucne ainogale migac.      **3:14:** 1Kor 9:24      **3:15:** 1Kor 2:6      **3:17:** 1Kor 4:16

gameineholec, yogodi yengele kwelewa madick-ecaigac, ailu yengele ngage-ngage yogo himongte gagawa fagac. Ngic ingucne yenge homaebongka gagangineng sowaledaicte.

<sup>20</sup> Aime nongileng wacnonggeng honocmengka fagacte honocmengte aling gagabeleng. Ailu Asababa ngicnonggeng Sugucne Yesu Kristo honocmengkacni kwesidaicte, yele wangec gagabeleng.

<sup>21</sup> Ye wiyac sasawa yeicne bagewa lonale tapili facnogac. Ailu yele tapili yogodi himongsocnonggeng waweweine yogo bafaliyeme yeicne soc ingucne tapili nga hibi-angoctowaineholec aidaicte.

## 4

### *Polle mimi-madic*

<sup>1</sup> Ilec ailu, ngic hae-gbafocne, kwelenedi ngengele angacnume nganicngebano-gale ainelegac. Ngengi belic-belic bafuwanelebong angacnugac. Ailu agofocne kwele-angackolec, ngenge yogolec ailu Sugucneholec wetackelu sanangne gadabiyeng.

<sup>2</sup> Yuodia nga Sintike, ngeke Sugucneholec wetacke galu kwele-moniyang ainagunictc, mimiloc yowa sanangne edocngepagabac.

<sup>3</sup> Aime agone, ga naholec bole bacaigicte yanguc edocgugabac, ngigac yaeckang yogo baficepadamec. I yangucte, yeke nga Kelemente, ailu ngic-ngigac nebcocine gocne yenge naholec galu

Siduc Madicnele bole balu gagaing, yengele wac Gagale hibiwa fagac.

*Belic-belicka gaga*

<sup>4</sup> Ngenge damengsoc Sugucneholec wetacke galu belic-belicka gadabiyeng. Ailu hatacmac mi-gabac, ngenge belic-belicka gadabiyeng.

<sup>5</sup> Sugucne emenonggang gagac. Ngic-ngigac sasawadi nganicngebabong ngenge gaga ulucne ailu gadaing.

<sup>6</sup> Ngenge wiyac monicte mi medecngebadaic. Ailu ngenge wiyac sasawale aingeleme, Wapong kwele-madicka wackelu uwacnolu milockedaing.

<sup>7</sup> Inguc aiyebongka Wapongte kwele-mogungti ngage-ngage-motoc sasawa ewaligac, yogodi kwe-lengineng nga ngage-ngagenginengte asa bame, Kristo Yesuholec wetackelu gadaingte.

*Aibaba gbagbacne*

<sup>8</sup> Ngic hae-gbafocne, yowa monic yanguc minogale ngagesigabac. Aibaba noine nga alang-babaholec, nga dondone ailu gbagbacne, aibaba weni yogodi nganibong angacine aicaigac. Ailu ngagebong madicne aicaigac, ailu aibabangineng madicne, nga mitengngebano-gale silic aicaigac, aibaba sasawa ingucnedi ngage-ngagengineng bame wakeyackedaic.

<sup>9</sup> Aime nani ngage-ngage wedungelebe ngageibong, ailu yowa nalacni hedecnginengti ngageibong, ailu dongenginengti nale aibaba nganiibong, ngenge bole yogo bayackedabiyeng.

Ngenge inguc aibong kwele-mogungte Wapong ye ngengeholec gadaicte.

*Filipai yengele kwele-madic yowa*

<sup>10</sup> Ngenge hatacmac nale ngagesilu aibabangineng hole-gboliyelu wiyac gocne baficnuningte loneleibong. Ilec Sugucne mitengkelu beliyegabac. Ngenge biyachac molickelu nale ngagesi-ibong, yogo noine. Ailu baficnuningte yefe monic mi fawecte kpungkelu hegileibong.

<sup>11</sup> Na wiyac gocnele kpungkegabac me balu gagabac, na yogolec mi edocngebacaigabac. Woc-wiyacne fanelegac, yogo sugu balu ngagebe nalic aime gacaigabac. Inguc ganogale ngage-ngage biyachac baiba.

<sup>12</sup> Ailu dameng gocna waweweine gaga, nga dameng gocna moneng-mafaholec gaga, yogo biyachac gaiba. Ailu dameng gocna nosing nogebec ailu gaga, nga dameng gocna nosing homacka gaga, nga wiyac bocyackolec gaga me woc-wiyac mikac gaga, yogo sasawa biyachac galu nganiiba. Gaga ingucne galu ngagebe nalic aime gacaigabac.

<sup>13</sup> Kristodi tapili nelegacte, wiyac sasawa yogo nalic aiyackedacte.

<sup>14</sup> Umacka gaebewa ngengi baficnuibong, aibaba yogolec ngagebe madickegac.

<sup>15</sup> Siduc Madicne molickelu edocngebaiba. Ailu Masedonia hegilelu hikeiba, dameng iwa Filipai habu ngengi sugu hiye-moneng baficnuibong, yogo ngagegaing.



16 Aime Tesalonika iwa galu wiyac gocnele heic aibe, nenge ngagelu dameng gocna inguchac baficnulu lolu gaibong.

17 Inguc mibe ngengi hatacmac wiyac neleningte milocnubagac, inguc mi ngagedaing. Na ngagebe nenge ameine madicne lobewa badaingte.

18 Epafodaitusdi wiyac gocne ngengelacni balu kwesilu nelewec. Aime wiyac monicte mi kpungkelu gagabac, wiyacne bocyac fame gagabac. Aime wiyac neleicne yogodi depec hoine madicne ingucne angacine aigac, Wapongti yogo nganime madickegac.

19 Wapongne ye woc-wiyacine wac feicneholec. Ailu yedi nenge woc-wiyacte kpungkecaigaing, yogo Kristo Yesule ailu nalic ngeleyackedaicte.

20 Wapong Mamacnonggeng Yela wac feicne moto-motoine mikac fafegidaic, yogo foinac.

### *Yowa moto-motoine*

21 Ngic-ngigac Wapongte bingec sasawadi Kristo Yesuholec wetackelu gagaing, nongele wenac-madic yogo yengela fugac yogo ngengi edocebadaing. Ngic hae-gbafocnonggeng yawa naholec gagabeleng, yengele wenac-madic inguchac ngengela fugac.

22 Aime ngic-ngigac Wapongte bingec sasawa yawa gagaing, yengele wenac-madic inguchac ngengela lobong fugac. Ailu aling yogo gocne Sisale macka gagaing, yenge wenac-madicngineng sugucnehac ngengela lobong fugac.

23 Sugucnenonggeng Yesu Kristole kwele-  
madicti asunginang fadaic.  
Yogo foinac.

**Migabac Bible Portions**  
**Portions of the Bible in the Migabac language of Papua**  
**New Guinea**  
**Sampela hap long Buk Baibel long tokples Migabac**  
**long Niugini**

copyright © 2010-2020 Wycliffe Bible Translators, Inc.

Language: Migabac

Translation by: Wycliffe Bible Translators

Audio recording © 2013 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-02-20

---

PDF generated using Haiola and XeLaTeX on 18 Apr 2025 from source files dated 31 Aug 2023

620e6058-116b-51e5-b20a-ab9e8b9bea5d